



Süschée 2016

Mensch, - Naledi!

Do hett me - dief in Süüdafrika unde
wieder emool alti Gnoche gfunde!
Iber Millioone vo Joore syge sie alt,
das losst uns drotz süüdlicher Wärmli nit kalt;
die gfundene Gnoche uss stailte Zytte
(nit numme vo Männer – nai, au vo Grytte)
nennt me jetzt **Homo naledi** – im Kärn
haist das uff dytsch ebbe; **Mensch** und **Stärn!**

Das **Affetheater** macht uns nit bang,
denn die **Homo's** kennt me jo scho lang;
so isch uns dr **Homo habilis** bekannt,
dr **Homo rudolfensis** isch au no markant.
S'git dr **Homo erectus**, das komische Wäase,
dä het me gfunde kurz vorem verjääse!
Und dr **Homo sapiens**, dr bekanntischt vo Alle,
macht hitte nit immer die beschi Falle!

Die **Evolutioon** iber dausigi Joore
bietet fir hittigi **Homo's** au Gfoohre;
in dr Sience-Fiction gseht me komischi Figure,
nit Bängger, Handwärgger oder gar no Buure!
Nai, sie fliege dur s' Wältall, dien schiessen und knalle,
und ganz langsam gseht me d'Ärde zerfalle!
Drbyy sott sich d'Wält wieder zämmeraffe
und zrugg evolutioniere - bis zue den Affe!

Die glainschten Aeffli hett me persee
uff de Mammut-Baim umme glättere gseeh,
drwyyl die Greessere in ainer Weehli
yy und uss gange sinn in Ihrer Heehli!
Denn hänn sy aber pletzlich – wie sich's gheert,
uff 2 Bai uffrächt laufe gleehrt!
Me froggt sich, wäre die – nit iberdriebe,
besser eierlegendi Wulle-Milch-Säu bliebe?

Doch d'**naledi** sinn nummen ainsuffzig grooss,
und stamme bestimmt usseme Glai-Affe-Schooss;
Eso kasch's verbinde in die hittigi Zytt;
scho friehner bis hitte git's eso Lytt,
wo glai sinn im Wuggs, aber greesser wänn schyyne,
do sinn jo d'Walliser au eh vo de Chlyyne!
Sone **naledi-Unggle** isch doch dr **Blatter Sepp**,
in sym Greessewahn – e klassische Depp!

Nur 45 Kilo sinn die im Schnitt – stell dr voor,
do längt e Stai vor dr Heehli, kai Schmidyyse-Door!
Hänn äggscht die **naledi**, s'isch sicher vermässe,
scho domools ebbe glutefrei gässe?
Oder isch's e Spleen gsi vo de **naledi-Schaabe**
mit ihrem läschtige Laktose-Gehaabe?
Uff jeede Fall hänn die Mini-Riise

nit bi uns am „**Wihte Dinner**“ gspiise!

Mit de krumme Finger sinn sy au go glättere,
die **Halbaffemännli** mitsamt Ihre Tschättere!
Und s'Orange-groosse Hirni zwischa den Öhrli
längt drotz Mini-Greessi fir dausigi vo Jöörli!
Uusnahme git's uss dr Velowäg-Gschicht;
em **Wessels** sy Hirni macht unklari Sicht!
So kennt me z'Basel im Dalbedyych hinde
no Gnöche vome **Homo Wesselsis** finde!

Dr **Homo neanderthalensis** isch jo au erkannt,
dä isch no mitem ältere **naledi** verwandt!
Und dr **Homo sapiens**, wo jo alli scho kenne,
hett gleeht, dass me 8 Stund pro Daag sotti penne!
Denn hett sone Gomser Priore- Schlawyner
no Gnöche in Rom g'hoolt vom Kardinal Schiner!
Die sinn denn nit vo dr Schwiizer Garde,
s'wäre - **Homo marignanolis** - samt Hellebarde!

D'**Evolutioon** goht wytter, und ains isch glaar;
im Wältall beweege sich **Star** um **Star**.
Me iberleggt scho fescht, ebbs derte - igitt
au no menschenähnligi Gnöche gitt?
So kemme denn bald au, in suubere Gwändli
uff unseri Aerde **d'Homo grien-männli**!
Au die Aiauge-Männli wäre glai vo Wuggs,
und wurden ussgseeh wiene griene Fuggs!

Stell dr vor, anere Demo, dr Baschy Dürr im Schlips
schiggt an d'Front sy Kommandant, dr Lips!
Baidi hänn Angscht, das wär jo denn quaasi
e neyi Sorte vo **Homo schysshaasi**!
Und die Vermummte – mit Coggtail und Waffe
sinn eh scho e neyi Sorte vo Affe!
Denn kasch wieder vo some Ussgrabigs-Wäase
e Superbricht iber **Homo Hooligansis** lääse!

In zig-dausig Joor wird wieder ebbis gfunde;
me haig in Basel grad am Barfi unde
e Hampfle alti Gnöche zämmeglääse
vomene typische „**Jungblut-Wäase!**“
Dä räasi Museums-Fratz haig persee
ganz pletzlich miesse Färsegäld gee!
Doch dr Cüpli-Morin maint do ganz klamm
s'wär vom **Homo Konservatoris**-Stamm!

Im Wältall goht, es isch zwoor schytter,
dä Wahsinns-Wandel immer wytter!
Vermuetlig git das uss dr Evolutioon
e neye **Homo metallic** als Sensatioon!
Doch mir QS, die Glaine und die Groosse,
laufen als Fasnachts-Affe dur d'Stroosse,
und dien denn am Donnschtig, nonem Zmorge
dr **Homo naledi** - ändlig versorge!

